



Napaartoq Isak Petrussen,
Demokraatit

§ 37 naapertorlugu apeqqutit nr. 30/2026-p akineqarnera

Asasara Napaartoq,

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaakka. Apeqqutit issuarneqartarput tamatumalu kingorna akineqarlutik. Apeqqutit 3-p,4-p aamma 6-ip akinissaannut Inussuk IT-imit akissuteqaatinik pissarsiniartoqarnikuuvoq.

Ulloq: 16-03-2026
Suliap normua.: 2026 - 3845
Allagaatip normua.: 26246575

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@naaog.gl
www.naalakkersuisut.gl

- 1. Peqqinnissaqarfiup ineriartortinnissaanut ukiuni sisamani tulliuuttuni Naalakkersuisut suut pingaarnertut periusissatut suliaarat aammalu qanoq tulleriiaarneqarpat?**

Akissut:

Naalakkersuisut peqqinnissaqarfik patajaannerusoq, akilersinnaannerusoq aamma ataqatigiinnerusoq, ukiuni aggersuni immikkut ittumik periusissiniarpat. Peqqinnissaqarfiup inerisarneqarnera siunissamut ungasinnerusumut aaqqiissuteqarnissamik, qinersinermiit qinersinermut allanngortinneqarneq ajortumik pisariaqartitsivoq. Taamaammat Naalakkersuisut Inatsisartuni partiit tamakkerlugit peqqinnissaqarfik pillugu isumaqatigiissut siammasinnerusoq pillugu oqaloqatigiinnillutik aallartippat. Naalakkersuinnermik suliallit siammasinnerusumik tunuliaqutsiinissaannik qulakkeerinninnissaq siunertaavoq, taamaalilluni peqqinnissaqarfiup inerisarneqarnera assigiimmik paasinnilluni pisinnaalersinneqassaaq aamma qinersinerit assigiinngitsut aqquasaaraluarlugit anguniagaq patajaatsuutinneqarsinnaalissaaq. Pingaarnersiukkat peqqinnissaq pillugu isumaqatigiissummi tungavissiorneqassapput, soorlu sulilersitsisarnermut, pinaveersaartitsinermut, pinartumik timikkut nappaatilinnut katsorsaanissamik neqeroorutiniq qulakkeerinninnermut, kræftimik napparsimasunik suliaqarfimmut, nakorsaatinut nalinginnaasunut, ernisussiornermik suliaqarfimmut aamma tarnimikkut napparsimasunik suliaqarfimmut kiisalu pisarialimmik aaqquissuussaarnermik sanaartukkatigullu pitsanngorsaarnermut tunngasut. Siammasissumik isumaqatigiissutit peqqinnissaqarfik eqqissinermik

siomullu oqaatigineqarsinnaasumik ataavartumillu pitsanngorsaanissamut pisariaqartinneqartunik inerisarneqarnissaanut tunissavaa.

Naalakkersuisut aamma danskit naalakkersuisuisa peqqinnissaqarfimmi suliniutit pillugit isumaqatigiissutip ilaa februaari 2026-mi isumaqatigiissutigaat, taamaalilluni peqqinnissaqarfik pillugu isumaqatigiissut siammasinnerusoq aningaasatigut tunngavissinneqarpoq.

a. Peqqinnissaqarfimmut periusissiap suliarineqarnissaanut piviusunngortinneqarnissaanullu akisussaaffik qanoq ittuua departementip peqqinnissaqarfimmilu aqutsisut akornanni?

Akissut:

Aqutseriaaseq atuuttoq naapertorlugu akisussaaffiit agguataarneqarput, tassanilu Peqqissutsimut Innunullu Innarluutilinnut Naalakkersuisoqarfiup naalakkersuinerimik tunngaviit aalajangersartarpai, peqqinnissaqarfiullu sulisoqarneq ingerlatsinerimilu atuutsitsinerit akisussaaffigaat aamma pisarialinnik suliat qanoq isumassarsiorfigineqarsinnaanerimik siunnersuusiortarlutik.

2. Ukiuni sisamani tulluittuni Kigutilerisoqarnerup ineriartortinnissaanut Naalakkersuissut suut tamakkiisumik suliniutiginiarpaat?

Akissut:

Nunatsinni kigutileriveqarfik arlalitsigut ineriartortitsiniarnermi, tassa kigutileriffimmi tikikkuminassuseq, piginnaasat pitsaassuserlu ataatsimoortillugit pitsanngorsaanissaq anguniarlugu suliaqarpoq. Periusissiaq Peqqinnissaq pillugu isumaqatigiissut kiisalu Nunatsinni kigutileriveqarfiup kigutilunneq akiorniarlugu periusissiaa 2025-2029, pingaartumik meeqqat inuusuttullu akornanni pinaveersaartitsinerimik suliniuteqarnerulernissamut tunngavoq. Peqqinnissaq pillugu isumaqatigiissummi Nuummi qitiusumik kigutileriffimmik nutaamik ukiuni sisamani tulluittuni pilersitsinissaq ilaatigut kissaatigineqarpoq. Kigutilerinerup inerisarneqarnerani kigutilerisut amerlassusaat kisimi sammineqarnikuunngilaq. Kigutileriviup attanneqaannarnissaanut suliaqarfiit allat apeqqutaasartorujussuusarput. Pingaartumik suliaqarfiit makkua; Kigutigissaasut aamma klinikassistentit Kalaallit Nunaanni ilinniarnermik ingerlatsinikut najukkamilu ilisimalluarneqalernikuusut. Taakkua sulineri pinaveersaartitsilluni suliaqarnermut aamma ulluinnarni meeqqanik, inuusuttunik ilaqutariinnillu attaveqarfigineqartarnerinut pingaarnerpaasarput. Inuiaqatigiit kigutigittuuneri pitsaasumik aqqqissuussaasumillu pinaveersaartitsilluni suliniutigineqarsimappata, amerlasuunik kigutileritinnissamik pisariaqartitsinerit soorunami ikiliartussapput. Tassunga

atasumik Kigutigissaasut pingaaruteqarluinnartumik inissisimapput. Kigutilerinerup siunissami ungasinnerusumi atuuttussanngorlugu pitsanngorsarneqarnerani Kalaallit Nunaanni ilinniarsimasut akornanni, kigutigissaasunik sulisoqarniarnerup piginnaasanillu sulisutigut pigineqareersunik atorluaaneq inerisaanerlu aqqutigalugit qulakkeerinninniartoqarpoq. Pitsaassuseq ataavartuunerlu kisimik tassunga tapertarineqassanngillat, aammali kigutilerinermik patajaannerusumik najukkanilu aallaaveqarnerusunik taakku tapertaassapput.

a. Kigutit nakorsaatut atorfiit maannakkorpiaq qassit inuttaqanngillat?

Akissut:

Kigutit nakorsai qulingiluat massakkut atorfeqartinneqarput. Neqeroorutip attattuaannarneqarnissaanut pisariaqarmat atorfiit sinneri piffissap ilaani paarlattaasartunit inuttaqartinneqartarput. Ulloq 25. februaari atorfiit tallimat inuttaqanngillat, aamma qaammammiit qaammammut amerlassutsit nikerartarput. Nunatsinni Kigutileriveqarfiup sulisoqarniarneranik tamakkiisumik kisitsisaannaat aallaavigalugit akissuteqarnermi takutitsisinnaanngilaq. Taamaammat pissutsit ilungersunartut tunuliaqutaannik erseqqissaaneq pisariaqarpoq. Soorlu kalaallit kigutilerisutut ilinniartinneqartartut naammanngillat. Nunatsinni Kigutileriveqarfik kigutilerisut avataaneersut suliaartortarnerannik sulii pinngitsuuisinnaanngilluinnartuuvoq. Siunissaq ungasinnerusoq eqqarsaatigalugu kalaallit inuusuttut amerlanerit peqqissaanermik ilinniagaqarnissaminnik toqqaasarnissaat taamaammat sulissutigineqartariaqarpoq, taamaalilluni Kalaallit Nunaannut attuumassuteqareerneq attanneqarsinnaaniassammat. Kigutilerineq ataatsimut isigalugu suliaqarfiuvoq ataatsimoorfiusoq, tassani pinaveersaartitsineq ataavartumillu sulineq aalajangiisuulluinnartuusarlutik. Ulluinnarni ingerlatsinermut ilaasut — pingaartumik pinaveersaartitsineq, peqqissuunermik siuarsaneq, meeqqanut inuusuttunullu kigutilerinerit — Kigutigissaasunit ilaannilu klinikassistentinit isumagineqartarput. Taakkua sulinerisa malitsigisaanik kigutit peqqissuunissaat qulakkeertarpaat, kigutileriterujussuarnissamillu pisariaqartitsinerit ikinnerulersittarlugit. Taamatut suliaqartunitaaq atorfinitsitsiniarneq ajornartorsiutaasarpoq.

i. Kigutilerisussarsiornermut kigutilerisullu tigummiinnarnissaannut suliniutit suut Naalakkersuisut aallartissimavaat pilersaarutigalugilluunniit?

Akissut:

Nunatsinni Kigutileriveqarfimmi suliniutit aalajangersimasut arlallit aqqutigalugit ingerlaavartumik sulilersitsiniaasoqarlunilu sulisooreersunik sulisorinniinnarnissamik suliaqartoqartarpoq, taakkulu ingerlaavartumik sulisussarsiorluni allagartaliinikkut ilaatigut ilaqtartut. Nunatsinni Kigutileriveqarfimmi ingerlatsineq aamma aaqqissuunneqartarpoq, taamaalilluni paarlattaasartut piffissamilu sivikitsumi sulisartut sapinngisamik eqaatsumik ulluinnarni kigutileriffinni sulisitsinermut ilaatinniarneqartarlutik.

ii. Immikkut ittumik suliniuteqarnissamik pilersaaruteqartoqarnerluni Nuup avataani atorfinnut inuttaliinissamut?

Akissut:

Nunatsinni Kigutileriveqarfik nunatsinni sumiiffinni aalajangersimasuni immikkut ittumik sulilersitsinissamut suliniuteqarneq ajorpoq. Nunatsinni nunap immikkoortuini pisariaqartitsineq, atorfinnik inuttaqanngitsut suliallillu aallaavigalugit siammasissumik ataavartumillu sulilersitsisoqartarpoq. Taamaammat atorfiit Nuup avataaniittut inuttalersorneqarneri nalinginnaasumik sulisussarsiornermut ilaatinneqartarput. Sulisussarsiornermi paasissutissat allagarsiinerillu soorunami najukkani pisartut uagut nalinginnaasumik sulisussarsioriaatsitsinnut ilaapput.

b. Aningaasat katilligut qassit kigutit nakorsaqaqarnerup iluani siunnersortinut 2025-imi atorneqarsimappat?

Akissut:

Nunatsinni Kigutileriveqarfimmi aningaasanut inatsimmi missingersuutit naapertorlugit (konto 34.13.01) 78,280 mio. kr.-nik immikkoortitsivigineqartumi 943.000 kr.-nit 2025-mi siunnersorteqarnermut atorneqarsimapput.

3. Elektroniskimik napparsimasunut nalunaarsuutip nutaap (EPJ) atulerneranut atasumik, akisussaaffiit qanoq agguataarneqarpat tassani pineqarlutik departementip, peqqinnissaqarfimmi aqutsisut aammalu sullissisut allat akornanni?

Akissut:

Pilersaarut EPJ massakkut Periusissatigut Aqutsisoqatigiit; Naalakkersuisut Siulittaasoqarfiata Naalakkersuisoqarfianit, Peqqissutsimut Inuillu Innarluutillit Naalakkersuisoqarfianit, Aningaasaqarnermut Akileraartarnermullu Naalakkersuisoqarfimmit, Nunatta Nakorsaaneqarfianit,

Digitalinngortitsinermut Aqutsisoqarfimmit aamma Inussuk IT-mit ilaasortaaffigineqartumit, massakkut aaqqissuunneqarpoq.

Aaqqissuussamik piginnittuuneq akisussaaffitalik peqqissaanermik suliaqartut suleriaasiinik, nakorsiat isumannaatsuunissaannik aamma aaqqissuussat EPJ-it pioreersut pigineqalerumaartussallu ingerlanneqarneri peqqinnissaqarfiup peqqissaanermut aqutsisuini inissisimatinneqarput. Taassuma saniatigut peqqinnissaqarfiup nakorsiartitsiviit eqimattartaannut innersuunneqartunik sulisoqarput, taamaalilluni suliniut patajaatsumik sulisunut inissinneqarsinnaavoq.

EPJ-programmip ingerlanneqarneranut akisussaaffik niuerfimmi misissueqqissaanertalik, pisiniarnertalik atuutilersitsinertalillu Inussuk It-imut tunniunneqarnikuuvoq. Taamaattorli suliaassap immikkoortua taanna Peqqinnissaqarfimmut massakkut nuunneqaleruttorpoq, taamaalilluni Peqqinnissaqarfiup ulluinnarni aqunneqarnera pisariaqartitaalu paatsoorneqarsinnaanngitsumik akisussaaffigineqarneri qanimullu attuumassuteqarneri qulakkeerneqarput.

- a. Naalakkersuisut piffissaliussatut pilersaarut suna EPJ-ip nutaap atuutilersinneqarnissaanut sulissutigaa?**

Akissut:

Suliniut ukiuni arlalinni suliarineqartussaq inaarutaasumik atuutilersitsinissaq sioqqullugu, aaqqissuussaaneermik pitsanngorsaataassaaq, pisariaqartitat ilusilersuinermilu immikkoortortat naapertorlugit periusissiornermik, suliariumannittussarsiornermik isumaqatigiissutinillu atuutilersitsinermik malitseqartumik imaqartussaavoq. Piffissalersuilluni pilersaarutip pitsaassusaa ingerlaavartumik, suliniutip tunngavii nutaamillu aaqqissuussaaneerup inissivinnissaasa tungaannut, pitsanngorsarneqartassaaq.

- i. Atuutilersinneqarnissaanut suliniutit qanoq sivilutiginissaat naatsorsuutigineqarpat?**

Akissut:

Apeqqutip akissutai 3.a-miittut innersuussutigineqarput.

- b. EPJ-ip nutap atuutilersinneqareernerani kia ingerlatsinermut akisussaaffik pingaarneq tigummissavaa?**

Akissut:

Peqqinnissaqarfiup aaqqissuussap EPJ-ip atorneqalersussap ingerlanneqarnerani, pilersuisoq qanimut suleqatigalugu akisussaaffik tamakkiisoq ullumikkutut akisussaaffiginiarpaa.

4. Peqqinnissaqarfimmi aamma Inussuk IT akornanni suliassat agguataarneri qanoq aalajangersarneqarpat?

Akissut:

Aaqqissuussap EPJ-ip nutaap suliniutigineqarneranut tunngatillugu inissisimaffiit 2023-mi ima aalajangersarneqarput: Peqqissutsimut Naalakkersuisoqarfik suliniummik piginnittumit atortut ineriartortinneqarnissaat, neqerooruteqarnissaq pisinissarlu akisussaaffigineqarlutik. Inussuk IT aaqqissuussamut EPJ-imut pilersaarusiornermut pisortamik atorfinittisusaaavoq – taassuma illuatungeriit attuumassuteqartut suleqatigalugit – Kalaallit Nunaanni Peqqinnissaqarfiup EPJ-imi pingaarnertut atuuffii pisariallit ilusilersortusaavai. Taassuma saniatigut Inussuk IT-ip pilersuisooratarsinnaasut pisariaqartitsinertik naammassisinnaajumallugu aaqqiissutissanik pillit misissortusaaavat. Aaqqissuussamut peqqinnissamut tunngasunik isummersuutit tamaasa ikkussuunneqarnissaannut Peqqinnissaqarfimmi aqutsisut akisussaasuupput. Taassunga atasumik Inussuk-IT-mi suliniummut aqutsisumik atorfinittisusariaqarsimavoq aamma aaqqissuussap atortuinut piunasaqaatit immikkoortui assigiinngitsut qulaajarnissaannut siunnersortinik avataaneersunik peqataatitsinissamik pisariaqartitsisoqarsinnaasoq naatsorsuutigineqartariaqarpoq.

Apeqqutip 3-p akissutai allat aamma takukkit.

a. Maannakkut aaqqissuussineq Peqqinnissaqarfimmi IT-mut tunngatillugu marlunnik ingerlatsisoqarnissaanik suut tunngavilersuutaasimappat?

Akissut:

Peqqinnissaqarfiup suliassaqarfiutaani IT-mi ingerlatsinerit marluk pineqanngillat. Inussuk IT kiserluinnarmi aaqqissuussamik EPJ-imik suliniutip ingerlanneqarnissaanut pissarsiniarnissaminik suliakkerneqarnikuuvoq.

5. Peqqinnissaqarfimmi IT-mut immikkoortortaqarfimmi ukiumut ingerlatsinerimut aningaasartuutit qanoq annertutigippat?

Akissut:

Ingerlatsinermut aningaasartuutit, akissarsianut aningaasartuutit aamma aaqqissuussanut akuersissutinullu aningaasartuutit ilanngullugit 2025-mi ukiumoortumik 43.597.394 kr.-iupput.

a. Peqqinnissaqarfimmi IT-immikkoortortaqarfimmi siunnersortinut 2025-imi aningaasat qanoq annertutigisut atorineqarsimappat?

Akissut:

Peqqinnissaqarfiup IT-mut immikkoortortaqarfiata 2025-mi siunnersortit sulisinnerinut 5.597.503 kr.-nit atorsimavai.

6. Inussuk IT-mi ukiumut ingerlatsinermut aningaasartuutit qanoq annertutigippat?

Apeqqutip uuma akinissaanut Inussuk IT-mut akissuteqaatinik pissarsiniartoqarsimavoq, taakkulu ima ilisimatitsippat:

"Inussuup pisortat ataatsimoorussamik it-imik aaqqissuussai suliniutaalu arlallit ingerlatarei. Inussuk IT-ip ingerlatsinermut naatsorsuutai tamarmiusut ukiumut naatsorsuuseriffiusumi 2025-mi 27,1 mio. kr.-iupput. Pisortat ataatsimoorussamik it-imik aaqqissuussaannut tunngassuteqartut akissarsiat ingerlatsinermullu aningaasartuutit aningaasat taakkua iluanniippat, makkua ilanngullugit:

- *Aaqqissuussaq aningaasarsialerissut*
- *Aaqqissuussaq ERP*
- *ESDH*
- *Aaqqissuussat taakkununga tapertaasut – soorlu NemKonto il.il.."*

a. Inussuk IT-p siunnersortinit sulisitsinermut 2025-imi aningaasat qanoq annertutigisut atorsimavaat?

Apeqqutip uuma akinissaanut Inussuk IT-mut akissuteqaatinik pissarsiniartoqarsimavoq, taakkulu ima ilisimatitsippat:


"Nalinginnaasumik ingerlatsinermi siunnersortinut aningaasartuutit 2025-mi katillugit 5.346.250 kr.-iupput. Aningaasartuutit siunnersortinit assigiinngiaartuupput, ikiortinnermit sulisut teknikkikkullu immikkut ilisimasallit aqunneqarnerinut atorineqarsimappat. Malugeqquneqarpoq, Inussuk IT suliaqarfinni siunnersortinik killilimmik atuisinnaanini eqqumaffigimmagu, amerlassutsit eqqarsaatigalugit immikkut piginnaasallit imaluunniit eqaallisaanerit immikkuullarissut qaffasissumik pitsanngorsarniarneqartarput. Aningaasartuutit suliniummut EPJ-imut aamma attuumassuteqanngillat."

**7. Naalakkersuisut oqaluuserisamut soqutiginaatilinnik allanik
paasissutissiisinnaanerlutik?**

Akissut:

Naamik.

Inuulluaqqusillunga



Anna Wangenheim